

13. EINOTO E MUSA I ENKISIKATA ENYE Enaidurra 1 & 2

Neye Yosefu naa ore tiatua ilarin iip ong'uan nebul olmarei le Yakobo oleng' te lalai neipoti ninche ajo olosho loo Siraeli. Neipoti sii aajo Ilhebrania... Ore teine nepuku, nebulu olaiguanani ng'ujuk leitu aekata eyiolou Yosefu. Ore pee edol ajo kumok ele osho loo Siraeli oleng', neureshoyu. Nelotu aita ninche arashu neitaa ninche isinkan. Neureishoyu ajo ebaiki nedumakino ninche Ilmisiri, neidimu ninche o meitayu enkitanapata metaari pooki ayioni naini to Siraeli te ina onlong' eini ninye. Kake ore inkatoyiok o Ilhebrania neany ening' enkitanapat e Farao. Nerrip Enkai ninche neponari Ilhebrania te siana sapuk.

Netii apa olmare loo Siraeli oing'uaa olgilata le Lawi oat apa enkiti ayioni sidai. Neisudoo ninye tiatua empeut kiti neitadoiki ina peut atua olkeju le Nail. Ore Miriam, ina anashe botorr eina ayioni, neisudori pee edol enaikuna olalashe lenye kiti.

Ore teina rishata, nelotu entito olkinki le Misiri adou olkeju le Nail tenebo olchoreta lenyena, nedol ina kerai, neya ninye aita enkerai enye nedung'oki ninye enkarna ajo Musa. Nelotu Miriam enetii entito o Lkinki, neikilikuan ninye "Iyieu naing'uraki enkitok o Siraeli, pee kilotu aibung'aki ena kerai?" nejoki ninye ina tito o lkinki, "Ee ing'urakaki enkitok o Siraeli naa kalak ninye maing'uraki ena kerai." Neishoori Musa ng'otonye enye meibung'a ninye. Ore pee ebulu enkerai aaku botorr, neya ng'otonye ayaki entito e Farao, neaku enkerai enye, nebul Musa te nkaji olkinki le Misiri.

Ore pee eaku Musa olee, ore nabo onlong' enetii iltung'ana lenye loo Siraeli. Ore teine nedol Olmisiri earita oltung'ani loo Siraeli. Neing'orisho nemeloo likae tung'ani too nchot pooki. Near Musa Olmisiri metua, neisudoo osesen lenye. Neyiolouni ina bae, neisik musa alo aisudori torpukel.

Nedol Enkai olosilisili loo iltung'ana lenyena Isiraeli, nedamu Enkai olmumai oinos tialo Abraham, Isaka o Yakobo.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Indim atadamu erishata nabo, nataase embae te iyie nilaikino enias pii, kake nikiret Enkai tialo ina bae?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBU: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- Kaji eiko ena atini teneutaki iyiook inchere keata Enkai engolon pooki? (keata enkitoria pooki, netii shumata pooki, neata enkitoo pooki.)

- o Nerrip Enkai ena kerai naji Musa tialo olkinki arani, nerrip pee meimis tiatua enkare nerrip te nkojong'ani, o kulie nguesi e ntim.
 - o Nedamu Enkai enaiko pee esaru iltung'ana lenyena tialo rindikisho. Neiterunye apa ena kipankata pee egeluni Musa tolgilata loo Lawi.
 - o Nerikoo entito e Farao meshomo aitukuo to lkeju le Nail ina kata etii Musa ine wueji pee etumoki aitajeu ninye.
 - o Ore hoo apa neyiolo ena tito e Farao ajo enoo Isiraeli ena kerai, nerikoo Enkai ninye metaramata ninye, kake pee mearr ninye.
 - o Nepik Musa atua manyisho e Farao pee etumoki ataretu Musa te siadi ayeu atigilunore Farao.
 - o Nerreten olkitamanyunoto le Farao peyie etum enkiteng'ena arashu enkisuma sidai, kake neisho ninye Musa meitubulu ng'otonye enye pee ebulu aa o loo Siraeli ake.
 - o Neirriwaa Musa meshomo olupurkel pee etumoki aterretena ninye pee elo arik iltung'ana le Nkai.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - o Etayiolo inchere Enkai, ore enkoitai nasarunye iltung'ana lenyena te Musa, neyiolo sii apa enaiko, pee eitajeu ninye Musa.
 - o Neyiolou inkipankat e ntito e Farao elotu aitukuo te rishare naje.
 - o Neyiolo inchere keata apa ena kerai tipat, neyieu erripoto, neyieu sii enkisuma sidai.
 - o Neyiolo Enkai inchere keyieu apa Musa ina rishata torpurkel pee etumoki aterretena ninye pee elotu aitorik iltung'ana lenyena.
- **Kaji eiko teneitodolu ena atini nchere eisinyati Enkai? (keitriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - o Etoorie Musa olosho loo ilmisiri lemeata enkirukoto terishat sidai.
 - o Kegira apa Enkai aasisho pee eoru iltung'ana lenyena too le Misiri.
- **Kaji eiko ena atini teneiteng'en iyiook inchere keata Enkai empiris? (kenyorrisho, keata olng'urr tialo ilaing'okok, nenana oshoke, neton ake eirorie oltung'ani)**
 - o Neretu Enkai olmarei le Musa pee etumoki atorrip ina kerai enye tiatua ilapaitin okuni, eton eitu epiki atua ilo keju.
 - o Nerikoo ina tito e Farao hoo neyiolo ninye ajo enoo Isiraeli ina kerai, pee eramat ninye, kake pee mearr ninye.
 - o Neigil ake arrip Musa, eidipa Musa atesesekuana Olmisiri (oltung'ani loo Ilmisiri)
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - o Neitaa Isiraeli olosho kitok.
 - o Nelo Enkai dukuya aibung' enkisiligata enye pee eitajeu iltung'ana lenyena te Misiri. Eisiligie apa Abraham te dukuya, tenebo o Yakobo inchere kekordu kenya iltung'ana lenyena te sinkaisho tenelusoo ilarin iip ong'uan.
 - o Etaa Enkai oloisiligayu pee errip nemitu Isiraeli hoo neata apa Farao imbaa enkarueisho.
 - o Eisiligie apa Enkai Abraham inchere keitaa eishoi enye kumok, neibung' Enkai ina kisiligata hoo neatai rrindikisho sapuk.

KAINYIOO KINTENG'ENA ENA ATINI NAIPIRTA OLTUNG'ANI?

- **Tia oitai eitodolu ena atini inchere keata oltung'ani tipat te Nkai?**
 - o Etorripo Enkai Musa tenebo o losho loo Siraeli hoo netii apa olosilisili.
- **Tia oitai eitodolu ena atini inchere ore oltung'ani naa olaing'okoni nenarikino enkitamioto tialo ng'ok enyena?**
 - o Ore ile Misiri nedamu ine nkarrueisho too losho loo Siraeli, neisilisil ninche, enyok amut inkera enye.
 - o Ore Musa te ng'oro enye, nesesequan oltung'ani (neaku olarani) makewan nenyok aisudoo.

- **Tia oittoi eitodol iyiook ena atini inchere keyieu oltung'ani Enkai, nemeidim aitajeu kewan.**
 - o Etonyuaa olmarei le Musa aitajeu ninye, kake eetuo alaikino te siadi. Neishoru Enkai enkoittoi.
 - o Ore Musa nenyok ajo aretu olosho lenye pee esesekuan olkitok le rrindikisho kake nebatata sii ninye. Ore enyuata enye neaku pesho.
 - o Ore iltung'ana apa pooki otii atua eararoto, nelaikino sii ninche ataas toki.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- o Atua inkaik e Nkai ake, amu meidim oltung'ani aitajeu kewan. Lasima pee esuj oltung'ani enkipankata e Enkai ake.
- o Eisiliga ninye ng'otonye Musa Enkai metaasa Enkai eyieunoto enye te nkerai enye.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- o Amaa anaa nayiolou inchere ira olaing'okoni nimiindim sii aitajeu kewan, tia oittoi ing'orua eretoto e Nkai? Amaa teneton eitu ishukokino ninye, kakua roruat tiatua enkishui ino iindim aawa tenakata?